

摘藻堂四庫全書薈要

集部

欽定四庫全書會要卷一萬六千五百十八

集部

玩齋集卷九

元 貢師泰 撰

碑

重修南鎮廟碑

會稽山在郡城東南十五里地氣廣博而隆厚峰巒蒼翠上出霄漢而天柱石飄卧龍諸山皆環列其下如臣妾之事大君罔不順伏趨嚮周禮職方以為揚州之鎮

信夫隋開皇十四年始即山立祠唐天寶十載詔封永興公祭用南郊之日歷代遂著常祀國朝加號王爵以孟春之月遣使齋香幣祠一太牢守吏齋宿具三獻禮其崇報之典視昔有加焉獨廟無守者有司又少涉其地風雨凌暴久而不免於摧敗傾壓矣至正四年春廬陵夏君日孜來為尹以故事謁廟下顧瞻旁皇曰尚可緩乎亟詣郡白狀郡長貳咸是其議俾更新之於是邑人相率分事竭作去其朽蠹易以堅良既增既廓百度

具興閱三月工師告成重門廣庭挾以修廡殿寢閑閑
齋廬翼翼神庀賓館悉稱弘麗且命道士陳道盛守之
盡覈故田奉祠事餘以給其食鼓鐘之聲鏗鉤四達齋
心竭誠朝夕惟謹然後克稱朝廷敬恭明神之意而山
靈川后鬼物衛從百怪之狀亦欬然森布流動於煙雲
莽蒼中矣竊惟古者諸侯祭境內山川而天子巡行四
嶽則舉望秩未聞其祀鎮山也史傳雖稱秦皇東祀會
稽而未聞其廟祭也然則歷世共事弗絕何歟蓋山川

能出雲雨則法當報祀而其神明之會非假屋室象設
宜無以寓其卷卷款款之誠此南鎮之廟所以歷千數
百年而益盛也況世傳神禹之興朝諸侯於斯乎嗚呼
神人協和而後理化大行六沴不作百穀用登吏茲土
者其可昧所重輕哉然廟雖隸縣境而山實一郡之望
山雖望於一郡而靈氣周流未嘗不上下磅礴乎吳楚
之域斗牛之墟也是役也固以見郡政之舉而夏君亦
知所重輕矣因作迎送神詩二章俾郡人歌以侑祀曰

神氣磅礴兮下廣深鎮南服兮鬱嶽峯宮庭徯兮孔碩
松與柏兮蕭森神之施兮澤濡惠我民兮不疵以愛錫
祀兮自天函香兮孔蓋神穆穆兮降升載雲霓兮翠旌
來儵忽兮從如雨肸豐融兮于豆于登

湖之頻兮山之陽神燕娛兮中堂歆參差兮拊鼓折瓊
華兮奠椒漿神將歸兮載起龍兩股兮旗旖旎神不留
兮奈何我之思兮曷已野有稷稌兮隰有蒲荷俾民樂
康兮降福不那春秋兮灌薦風雨兮崇阿

杭州路新建南嶽廟碑

南嶽衡山在荊州之野祝融之墟蓋五嶽之一也自黃
帝堯舜以來莫不崇祀而副以瀦霍二山漢武南巡以
衡山遐遠阻江徙祭其副徵諸典禮班班可見我國家
混一天下歲時遣使代祠惟謹杭州北門外故有霍山
行宮圯壞不治比年將吏有別建廟於太平里之通衢
以祠神之從者層簷窮棟䟽櫺閤戶金碧輝煌規制宏
麗戊戌秋九月丞相康里公過而見之進父老曰東嶽

在魯境內所在猶廟祀不置况衡山寔纂我南服者乎
然惟從之祀而象設未正非禮也乃捐金命工中塑嶽
帝象旁從六神兩廡繪山川鬼物之狀車馬仗衛出入
之儀因其舊而更新之明年正月率僚佐藏事于廟裸
薦興俯小大咸一靈風肅然神若歆享因顧左右曰若
是固足以稱神明之居矣然不可不思所以經久者乃
割錢唐履泰鄉官田六百畝命龍虎山道士祝升智掌
其祠事仍以西太乙宮真人王用亨主領之未幾升智

又買廟後民地得六百餘步以增創之然後殊庭真館
邃宇重堂莫不秩然並起矣既事執事者請紀其成竊
惟漢武因其近以忘其遠即其副而遺其尊曷若廟貌
之設猶不失其本真哉况山川之氣無所不通神之周
流亦無往不在精誠感召如響斯應秩而祀之又何嫌
焉乃作迎享送神之曲俾歌以侑祀曰

靈連蜷兮夷猶駕文豹兮赤虬不我即兮我心則憂靈
繽紛兮來下朱兩幡兮從如雨舞婆娑兮坎其擊鼓鬱

金裸兮椒漿烝穀兮芳薌靈醉飽兮在堂

靈之去兮不我留湖水春綠兮吳山秋望回飈兮綢繆祛
予灾兮逐予癘降予以福兮壽且祉歲復歲兮報祀無已

杭州新城碑

至正十八年春平章謁太尉曰錢唐東南重鎮地當衝
要城郭不完其何以守太尉曰然茲實大役汝其白之
丞相丞相謂天方旱民將弗堪議久未決則又曰丞相
無憂也當有以處之遂詣太尉請出粟二十萬石以始

興築命郡守謝節考觀圖志以諮故實度地植表以正
方位視民力上下田賦多寡授之丈尺以均其徭發姑
蘇吳興嘉興松江四郡及一州兩縣四隅之民更相作
息以亟其成猶慮夫趨事之或息也則督部將先築錢
唐門並湖者數百丈為之程勸且誓群有司曰凡今之
為非徒勞民且費也勞之將以休其力費之將以衛其
財諸君其勉喻之吾且日視其勤惰矣其自候潮門步
至東青門則平江守周仁治之自錢唐門步至豐豫門

則吳興通守陸大本判官張士俊治之餘杭則嘉興通
守繆思恭治之艮山北新清波則松江通守謝禮推官
馬玉麟治之和寧與錢湖則屬之海寧州仁和縣而總
其役者實謝節也令下之日風馳電驅小大奔走莫敢
不共伐石于山浮木于江舟輸輦載千里相屬荷鍤揮
杵萬堵皆興曾不三月而功已告成凡用石之工一百
六十二萬木之工一十五萬圻之工一百八萬金之工
二萬徒一千三百五十萬土石磚甃灰鐵木植麻梲之

數累鉅萬億而不可勝紀也城之周六萬四千二十尺
高三十尺厚視高加十尺而殺其上得厚四之三焉甃
以貞甃錮以堅珉礦堅堊塗雪立虹貫舊城包山距河
故南北長今則截鳳山於外絡市河於內故東西廣而
廣輪適中焉為門一十有二東曰候潮曰新門曰崇新
曰東青曰艮山西曰錢湖曰清波曰豐豫曰錢唐南曰
和寧北曰餘杭曰天宗曰北新上各建飛樓四楹而外
為甕城門皆左右闔其餘艮山清波各為月城環旋

出入互相屏蔽鑿石為樞冶鐵為扇金鋪銅環啓閉有
則縣以飛梁塹以重壕內凡二百步設鐙道以上下人
馬外凡百餘步岌方臺以便矢石其上則發號之亭邏
卒之舍睥睨樓櫓連輓飛礮靡不畢具於是崇墉堅壁
若天造地設神鬼變化而形勢為之一新矣經始於十
九年七月十三日迄功於是年十月某日平章乃詠吉
日戎服上馬監軍司馬握刀抽矢從以鼓吹登城合樂
以大落之千夫行酒萬牛共炙高管遏雲飛旌耀日文

學智謀之士貔虎熊羆之將頡頏起坐更迭唱酬遠近
觀者盈城溢郭罔不心懼目駭以驚異其儀觀之偉成
功之速也既事其賓僚將校相率請文以垂顯刻固辭
不獲而其請益堅遂為之記曰杭之為郡左江海右湖
山內接京畿外控諸國潮汐晝夜一再往返風颿雨舶
瞬息千里象犀珠玉之珍杭稻魚鹽之利常溢於廬市
而其俗又機巧多技能故五方之人咸集於此邑屋繁
華貨殖填委可謂庶且富矣其城創於隋楊素者週迴

三十六里竒廣於唐錢鏐氏者七十里方是時五季迭起干戈相尋錢氏獨能保有茲土以國覲宋及我天兵南下農不弛耕市不易肆涵煦休養又將百年故民生不識兵革而城郭益廢不治十數年來遭時弗靖或遇小警則民心遑遑奔走駭散而守者亦莫知攸措今平章乃能懲禍於既往防患於未形僉謀獨斷以作斯城使國本以壯民生以寧立久安常治之基無一旦隳突之患所以贊襄丞相太尉而翊戴王室者其功烈爲何

如哉昔者南仲之事文王則城朔方以息四夷之難仲
山甫之事宣王則城東方以弭諸侯之亂播之聲詩載
諸簡冊千載而下猶使人咏歌欣慕不能自己然則平
章之興茲役也其有見於南仲仲山甫之事其君者與
勒銘垂勛其可少乎詩曰

於赫皇元囊括乾坤作民父母聲教誕宣二祖九宗垂
統繼極皇帝嗣位克肖天德百年于茲文恬武嬉萬國
一家城郭弗治人衆物盛豐生不測海內騷然小大失

職皇帝曰咨孰殿東南僉謂康里協于帝心汝作丞相
于甸于理懷柔協和以對天子有嘉太尉克綏我民疇
其相之平章弟昆仲也死節行錫廟食季也秉鈞兼總
宥密睠茲錢唐左湖右江提封千里實為大邦曰隋楊
素載興版築五季之際保于武肅宋復休養生齒日繁
仁漸義摩則惟我元盛極則否民亦瘁止狂童隨突四
郊多壘不有嚴城其何以寧廼究廼度廼經廼營廼召
長吏廼集將校令出維行是則是效按圖審勢庀財鳩

工師徒響應役夫景從荷鍤成雲揮杵如雨分程考工
各立部伍樹幹林比聚斲山巍縣梯輓石鬼運神移力
作薨薨和聲許許並驅齊興千雉萬堵崇墉既起壯我
雄藩鑿樞承鍵截鐵成闕虎符魚鑰式嚴啟閉動靜應
時內外合制穹樓傑閣倚天絕雲丹碧炫耀五采成文
限以長壕防以連埭跨以飛梁洞屬闌闌舟航水塞車
馬陸填百貨之委商賈貿遷珠玉象犀南金大貝休任
離題諸蕃畢萃既庶且富則教其民民曰忠孝敢不敬

承忠以事君孝以事父允蹈斯言天錫爾祐昔也無城
民何以依今也城成按堵而居昔也我民朝警夕備今
也我民戶不夜閉我有室家予以康之我有粟帛予以
藏之我作我息我出我入變呻為謳伊誰之力伊誰之
力相臣將臣固我金湯以衛我人吳山蒼蒼海波不驚
天子萬壽四方底平

建安忠義之碑

至正改元之十八年皇帝重念閩海道遠用兵日久民

弗堪命詔浙江等處行中書省平章政事布哈特穆爾
以便宜移鎮之公既蒞事務修厥職明年淮寇陳友諒
遣其僞將鄧克明等由建昌分三道犯閩又明年春三
月陷延平夏五月乙亥圍建寧時經畧使巴延布哈在
城中遂以總管阮德柔為叅知政事調度諸軍都事余
元善檢校趙璋治文書以佐之達嚕噶齊般若特穆爾
主餽餉同知陳子琦賈葉嚕莊文善各率所部往來接
戰仍與理問景福昔寶萬戶劉八十朱建安鎮撫昂吉

爾岱田成住李庸嶽丞祖托音布哈劉丞祖唐齡府判
廉達爾瑪周宗仁推官左惟溫經歷徐興福清州同知
蘇顯忠等分門拒守江西行樞密院副使明安與軍政
元帥呂天澤司礮石江西僉憲吹吉結帕克江東僉憲余
觀詢謀勉勵以獎士氣尋陞陳子琦為郎中賈葉嚕為
理問莊文善為宣政院判官昂吉爾岱田成住為萬戶
既而賊勢益張公急督牙將合諸縣兵援之秋七月丙
子復延平戊寅建寧圍解又明年春三月鄧克明復導

渠帥胡廷瑞康泰大舉入寇三月庚申陷邵武五月辛未奄薄建寧城下當城西北立十數砦以鐵礮火箭雲車機弩晝夜攻突不少息城中食且盡公聞之顧謂叅政張裕曰此劇寇也我當親往督師凡資糧屨屨之在行者子其速治之平章旺扎勒特穆爾左丞特穆爾喇實奮然起曰公掌符節義不可行行在我等即日誓諸將于庭褫旗纓鼓行次延平號令嚴肅道路所經果穀如故賊聞官軍且至攻益急平章謂左丞曰賊今深入建圍

未可卒解汀州總管陳有定戰數有功以為參政任
上流事則賊勢自分左丞曰善然非躬往不可秋八月
壬辰左丞馳數十騎冒圍入城中城中軍民呼號喜曰
左丞來吾屬生矣時參政阮德柔實總軍事且以其兵
守平政門參政魏留家努以其兵守南門賈葉嚕陞元
帥以其兵守朝天門陳子琦陞總管以其兵守臨江門
申號令以嚴備禦者達嚕噶齊蔣吉沙同知天保四萬
戶如故而益以和卓董桓也據要衝以為聲援者右丞

章旺扎勒叅政鄭敗龔思永行樞密院判官賈奇爾圖也近以舟師次水南者延平達魯噶齊趙唐古岱也留寓而籌策者仍三僉事更佐以江西經歷葛元喆也在告而分任其事者郎中鄭潛達魯噶齊般若特穆爾也九月賊梟將辛某復益兵來攻我去城不五十步連置營壘勢危甚乙卯左丞率都事張貞王斌理問伊埒雅蘇及掾屬等會諸將於官山新城議所以擊賊者於是阮叅政首出拱北門焚檄攬山砦魏叅政出南門奪水南砦

賈葉嚙敗餘黨於菱角塘陳子琦董天麒亦敗之於萬
安州獲牛羊馬驢甲冑鎧仗之屬不可勝計賊自相踐
溺死者千餘人丙辰賈葉嚙乘勝復建陽戊午陳有定
復邵武賊散走者輒遮殺之餘悉度關以遁平章左丞
既振旅還會府論諸將功公方第其賞賚之等諸將咸
曰去年建寧受圍六十四日大小三百餘戰居民壯者
執干戈老弱運磚甃婦女治饔飧晝夜目不交睫四面
矢石雜下死傷甚衆雖重創且攘臂轉戰不已城賴以

完今年圍又一百八日居民力戰視昔勇益倍倉庾竭
則悉出穀粟以給餉帑藏虛則傾所有繒帛金寶珠珥
以助費至於剝木皮苴草本以待頃刻之命猶分食飲
以食戰者雖童孺羸瘠亦乘城怒罵誓不與賊俱生建
城幸不陷而我等得以成功者皆吾民奮忠效義之所
致也其敢私賞賚而忘吾民耶公曰善哉既行賞乃命
權司發廩鹽四千斛以遺民食仍命有司立石通衢題
曰建安忠義之碑為八郡勸以師泰嘗承乏太史也具

事始末來徵刻文竊惟先王建邦設都必負谿山之險
嚴壁壘之制者所以禦強暴而防禍亂也然而高城深
池卒不能勝一朝之變由民心之不固也是故教之智
仁以育其德道之任卹以和其心勉之樹藝以厚其生
薄之賦歛以休其力然後上下相親休戚相係若子弟
之衛父兄設有患難雖使之赴湯蹈火猶且不懼又肯
疾視其長上而不知救也耶比年橫兵連起所在吏民
望風遁去連十數城無一能守者甚者反為嚮導甘於

臣僕又甚者率其子弟攻其父兄天網人紀於是極矣
獨建安之民能以孤城抗守連歲非真有所見者能之
乎吁偉矣哉夫忠義固本於人心而激昂獎勸則在上
之人今相府不有其功而歸之諸將諸將不有其功而
歸之於民民其有不效死者乎況建安實徽國文公講
道之地郡縣有祠閭里有塾而五劉之忠三蔡之學游
胡真氏諸先生遺訓具在凡事上使衆之方尊君親上
之道其父兄子弟聞之熟矣茲以數千之遺黎去十萬

之強寇休風丕烈卓然冠乎東南而光照海岳厥有由
哉為之詩曰

元德天齊帝敬日躋奄有萬國遂式九圍盛極豐生狂
狡突隕河蔓南北山延東西于淮于江流禍不已暨于
閩邦叫呶蠭起鴟張角拒毒甚蛇豕犯我疆場潰我國
紀維爾建安城固以完再至再敗卒莫我干我民繹繹
我師桓桓各率爾力以卻凶頑倉庾之竭民則我食帑
藏之虛民則我給不令而趨不呼而集載戰載守靡日

靡夕寇既退矣賞賚斯論相曰汝將將曰汝民功成不
有懿德是敦翦翦克讓遂有休聞天佑其忠人服其
義孰不賈勇以張士氣芝山巖巖建水瀾瀾生既復生
死猶不死維學之正維道之隆施於後來烝烝其從抑
澆揚淳以激其風伊誰為之徽國文公平章曰都宜錫
爾美敢錄以聞稽首北面天子聖明東南實眷刻石垂
休臣百其勸

江浙等處行中書省平章政事強通公功德之

碑

皇元受天明命撫有萬方承平百年民生熙熙不識兵革一旦釁起汝蔡毒流荆楚以及江浙皇帝重念茲實大藩非得威信重望之臣不可廼至正十二年秋詔遼陽等處行中書省平章政事強通移鎮之冬十有二月公至視政其時江東之饒信徽廣德鉛山浙西之常湖建德悉陷於賊且急犯三關以窺省治公召僚佐將帥語曰皇帝以重地畀我等治地方萬餘里屬郡三十二

今若此忍時刻緩乎爾其即率所部分兵以進其或資糧有不供器械有不備凡在行有不給者其責在我紀律不嚴戰鬪不力慢期愒日以殄我師則罪其可辭於是大小震懾莫不用命所向克捷曾不踰時郡縣皆復乃合長吏按視民數盡出註誤勞來招集俾安其業仍發粟賑之而後流離之民遠近畢至矣省治燬茨舍露處吏告經始公謂故址隘不足以稱大藩之觀宜更大之或以役重費廣白公曰吾方藉此以贍貧民奚為不

可是殆非若等所能知也遂伐石於山浮木於江分官
董工萬手並作功既落成而民賴以全活者甚衆杭郡
學創而復廢會其所入不足取旁郡學院餘財益之規
制宏敞視昔有加公率僚屬行舍菜禮彬彬揖讓在津
之士咸稱頌焉其他官寺傳舍樓觀之屬有關於政者
罔不完治雄書大扁弘偉端重識者以為如其人十四
年冬太師中書右丞相托克托公大舉南征一切軍資取
具江浙穀粟薪薪橐結之需弓矢刀劍戈矛甲冑之用

動以萬計陸運川輸千里相屬使者督趣旁午公能推誠感物以簡御煩周旋上下曲盡其道遂使民不告病官無廢事明年春常州無錫盜起縱兵大掠進逼郡治斷驛道衆議以重兵殲之公曰赤子無知弄兵迫於有司故爾若能諭以大義彼自來歸衆聞之皆投戈解甲請為良民又明年秋義兵元帥方家奴鈎結同黨相煽為惡出入擁兵馳突白晝殺人掠財物無顧忌公白丞相喀爾公麾左右斬其首以徇杭民大悅初公至杭承

兵亂之後有司乘間為市厚歛薄給公私益耗公選於衆分詣屬郡收其贏餘得粟數十萬石公節財用出入尤謹非當於事一毫不妄予人故費雖鉅而歲漕之入方物之貢未嘗匱也設有市於民必使視其高下而平其直吏亦不得並緣為奸人皆樂輸之又明年出鎮海寧海寧東距杭百里地瀕海磽瘠其民散處荒落間終歲力耕猶不足以自給公惻然念之戒士卒不得離部伍輒入人家雖左右僕隸人亦鮮識其面居二年如始

至既去人益懷之公在政七年朝廷歲遣使錫賚不絕
平居勤儉出天性祁寒盛暑晨出暮歸一日不敢自逸
身為將相而自處若寒畯一遇賓客則盡歡乃已祿賜
外家無贏財清苦之操老而益勵天下之人識與不識
聞其風者無不稱歎與人交恂恂自守至臨事毅然有
斷雖萬夫不可奪嗚呼可謂得大臣之體者矣公喀爾
氏字明德祖父明埒特穆爾贈益國公父烏魯斯光祿
大夫四川行省平章政事贈益國公公蚤以勛臣世家

之曹遇知仁廟給事內廷後長宿衛擢授中奉大夫大
宗正府掌判三遷至資善大夫上都留守出為淮東廉
訪使入為工部尚書拜河南行省叅政左丞進資德大
夫甘肅行省右丞遷山東廉訪使改樞密副使陞同知
除侍御史陞中丞領侍儀司事兩陞皆特命也進榮祿
大夫江西河南行省平章政事遷太府卿復留守上都
提調虎賁侍衛親軍都指揮使司加光祿大夫平章行
省遼陽遂來江浙召拜翰林學士承旨未行改平章行

省淮南未行還任江浙加銀青榮祿大夫踰年改福建
行省平章未行天子念公久勞於外且南臺按治四省
為尤重特拜江南諸道行御史臺御史大夫賜上尊御
衣以寵異之實十八年秋九月也公既去之五月杭大
夫士及其庶民父老日造丞相府俯伏頓首請曰吾儕
小人得不即死以至於今日者丞相與平章力也丞相
幸留惠我而平章已去省吾民獨能已於思乎將圖刻
於金石樹之省門之外以昭示無窮用敢冒昧以請丞

相以屬師泰師泰不敢以固陋辭遂為之銘曰

維帝作極維臣其命維獄降賢俾輔元聖龍驤虎躍
乘風翼雲統一萬國坤寧乾清有偉喀爾世著茂蹟帶
礪河山子孫奕奕祖也益國錫爵上公父也繼美適績
大功維賢有子克承克似遇知仁皇入備宿衛能以恭
謹出入禁闈帝曰汝衆汝其長之汝賢汝文可判宗正
我還汝留我京汝尹出則司憲入則考工克修汝職令
聞日隆河南西涼既叅既丞樞機宥密貳副繼登執法

之司儀表中外玉帶袞衣歷踐台位睠茲江浙新刻於
兵疇其鎮之僉曰公能皇帝曰俞汝其予治衛以虎賁
錫之弓矢公騎如雲公來自東誓將出師誅止其兇且
附且降我疆我里有誼撫殘其來如子粟施於廩其惠
則均物取於市其賈則平內節財用外蘇民力祁寒盛
暑朝出莫入民庶安矣我心則寧乃構公堂乃經乃營
公堂既成孔廟有翼敷政設教是効是則王師大舉其
會如林供億巨萬悉資東南漕粟飛芻千里相屬指顧

有方饋餉用足彼蚩者氓梗于毗陵惟德之綏不煩以
兵彼狂者獮于抗之里德不可懷梟首以示公馮駸駸
出鎮海寧公來幾時海波不驚公胡遽行實是南紀公
不我留我留不已昔也克獷我掠我戕今也甫安煦我
瘼傷昔也姦貪我腹我剝今也甫安去我毒蠱我饑公
哺我寒公衣撫我卹我我胡不思天錫我公彌壽遐福
以莫不庶以受百祿公曰豈敢天子聖仁惟天子萬壽
以福我後人

江南浙西道肅政廉訪使楚迪爾公德政碑

至正十六年冬皇帝重念江浙用兵之久既遣大臣出鎮之猶慮司風紀者不能深諭旨意乃以江浙行省左丞楚迪爾公為江南浙西道肅政廉訪使時官廩匱乏民力凋耗公私大困公視事慨然嘆曰天下承平則擊奸去邪職也今日之事其在安靖而輯之乃挈綱維申令典務存大體以清治化屬行臺移置會稽公需之物吏白下有司治公曰有司即擾民矣遂出公帑市于民悉當

其直民甚便之杭之三關曰昱嶺獨松千秋控扼宣歙
諸郡公首議增修堡壘嚴兵守禦賊屢犯輒敗去賴以
無虞軍士有暴橫者短衣露刃白晝群行市中殺人而
奪之金有司莫禁聞公來皆避逃去且相戒曰監司大
人不可犯也異時軍民雜處淆亂無別甚者遂私其室
公語其帥於北關門外夾河築五壘徙居之亂少已杭
故無城守保結之法久而益懈公更令戶大者長萬夫
次千夫又次百夫立部伍別旗幟上下相維視它郡最

爲嚴整郡縣屬兵後吏並緣爲姦公取其尤無良者懲之餘皆重於犯法司稅者多結市井無賴子分布遠近以漁獵商人令悉禁止物價遂平倉吏歲當更有司輒視貧富爲去取公廉知其弊父老奉香擁拜道上曰此細故公幸留意焉吾儕小人有所賴矣西湖書院在憲治之西尊經閣歲久益壞公出私庾白粳二百石大興修之丹雘髹漆煥然一新識者固知其深有得於治本矣三吳之使來輸忠款丞相議遣官往報衆未決公獨

力贊其成迨今民受其賜焉十七年秋上聞而嘉之擢行
省右丞賜上尊金幣慰勞甚厚臺臣尋以治狀聞監憲
如初按太史周燾所著武功錄公以浙東元帥董師江
東克復三路二州一十三縣全活十數萬人所至撫摩
煦嫗民爭歸之及其還鎮於鄞也置修城田以絕橫歛
復赤杭糧以便輸納增鄉飲田以敦禮讓凡可為斯民
計者無不深思而致力焉及今監憲又能維持綱紀周
旋上下以康濟時艱非其寬仁雅量包涵容蓄無施不

可安能使人翕然嚮化若是哉公字子元號春野蒙古
氏曾祖聳于山太師中山王祖德埒克紳河南行省右丞
父烏遜江浙行省平章公由近侍拜南臺監察御史歷
四道廉訪使翰林侍講學士累官榮祿大夫今為江浙
行省平章政事銘曰

昔我世皇既定四方分命百司乃紀乃綱大江以南釐
為十道十道之長維賢允蹈瞻茲西浙實為大藩地廣
物夥民庶事繁我公之來屬時孔棘務存大體用作民

則短衣朱抹白晝掠金片言之出強暴草心奸吏舞文
戕我善類罰止其尤罔敢或肆三關頡頏控扼東西連
營高壘賊莫敢窺什伍其民互相保結以戒不虞以安
爾業闕征有度商賈乃來筦庫弊除吏民畏懷乃新學
宮以振教鐸重門廣庭穹堂傑閣公既戾止玉節繡衣
來游來觀是式是儀是式是儀邦之司直邦之司直克
修厥職皇帝曰都使往南國文錦上尊式彰有德台鼎
甫踐憲命復臨予非汝私實民之心公拜稽首曷敢不

欽天子萬壽以宣德音

重建清平山西天元興寺碑

杭之吳山西南行數百步其勢委而復起曰清平山右旋而東浮屠居焉曰西天寺延祐丙辰歲贈太師中書右丞相和寧忠獻王托克托始來江浙為丞相時會西天郭達木實哩班迪達師駐錫茲山王見而異之曰此佛祖上乘人也涉流沙萬里東來而適與吾遇非夙緣乎乃厚出金帛施之俾拓地創業建大招提且為修息之

所越二年王還朝師居山中益久一日謂其徒曰吾歸
西天矣遂拂袖去莫知所之後有見之秦隴間者時已
百餘歲矣至正乙未天子以江浙用兵之久民力凋弊
思復重臣治之遂以王季子中書平章達實特穆爾階
金紫光祿為左丞相凡招降討逆賞功罰罪一切許以
便宜居數年政大修舉上聞而嘉之遣使錫勞加儀同
三司因感嘆曰此皆先王之教非臣之能也其將何以
報國家之恩寵而慰安先王哉間以暇日登覽湖山訪求

遺事則寺燬已久獨舊鍾存榛莽間王之名識具在徘徊顧望惕然興懷乃出錫金規復舊制工師效能民吏協勸曾不踰月而穹堂邃宇廣殿重門藏經之室縣鍾之樓香積之厨栖禪之館罔不畢具繚以周垣甃以文石朱檻雕題寶幢珠絡佛菩薩天人之象香花燈燭之供鍾魚鐃鼓之音鏗鉤炳耀視昔益加盛焉乃更號山曰清平寺曰西天元興又於殿左創屋四楹奉祠先王割田以供祀事餘以飯其僧凡所以盡心圖報者可謂

無所不用其極矣王康里氏幼侍武皇歷登華要知樞
密院事拜御史大夫以至命相封王其中子特穆爾達
實中書左丞相贈太師冀寧文忠王皆以盛德大業垂
勛竹帛王之在江浙也鑿市河以通舟楫出粟米以賑
貧民去今三十年深仁厚澤藹然猶洽於民心今丞相
復能以宏材大度康濟時艱使朝廷無南顧之憂黎庶
有樂生之望豐功偉績光昭前烈茲寺之興豈獨致嚴
追遠以永其孝思而已哉庶將祝釐錫福為人臣效忠

之勸爾師泰不敏甚幸以文墨論議超佐下僚用敢備錄其始末而為之贊曰

大邦維杭左湖右江吳山中起群峰來降清平之陽元
興有寺誰其作之王喀爾氏高僧達摩來於西天雄偉
博大神光熒然王既見只王心則喜穹堂傑閣斯實
創始隻履之歸却火灰飛王亦逝去樂極於西王有賢
嗣出入將相來殿南服為國屏障乃登茲山裴回顧
瞻梵宇再新王祠孔嚴丹楹金題寶幢珠絡神象巖巖

鼎天龍踊躍趨趨嫖侍魔舞鬼歌雨花風枝散亂交加
精神感通用錫繁祉人孰不曰忠獻有子忠獻有子克
繼克似踐父之位行父之志維父子濟美以輔我家邦
以欽于世世

四明慈濟寺碑

慈濟寺在明城之東鄞江之上故泉州德化縣尹楊侯
秀為乾符觀主太虛容法師創建者也侯郡人仕宋為
監舶官入國朝嘗使暹人以其主來朝當涉海時風猛

濤怒舟幾覆侯於恍惚中若有見觀音大士者因得無
害歸而圖所以報祠焉聞容公東南碩師遂往謀之師
曰明之山東玉几峰為阿育王舍利之藏又東補陀落
伽山為觀音示現之地朝廷歲遣使禮祠兩山而王公
僧俗川浮陸走以禱以禳者常肩摩而踵接侯果能即
其地之衝創寺以為延接之所則報無踰此者侯曰信
然非師不可廼買地度材用創茲寺前建大殿後闢方
丈三門兩廡丹雘輝映而正觀之堂栖禪之室庖湍庫

庚亦莫不次第興舉矣至大二年上之朝始被今額錫
璽書加護仍號師淨妙慈行真辨圓悟法師俾其徒甲
乙為之主於是四方禮祠兩山者有所歸焉初寺之興
也地瀕鵠鹵食飲苦之一日行寺之東偏曰此宜有伏
流購其地鑿之果得甘泉雖大旱不竭他日又將即
泉之北創歸寂之塔衆謂泉南大樟能出光怪里人
方神之懼興作有犯師笑曰吾已示之矣其夕天童雲
外岫公泊舟樹下夢老人求詩謝去明年師壽七十召

其徒法言可貴曰我佛世尊教從聞中入流亡所遂得
空滅我何以即解脫乎復執可貴手曰汝父儒者生汝
時夢兩老禪至老禪宗門魁碩也汝今為我弟子豈偶
然哉凡我所未了者其在汝乎言已趺坐而逝衆既奉
師全身歸諸泉北之塔而傳其業於言言居十年賴以
不墜及貴繼之焦心勞思務承師志間顧其徒曰昔
者寺址甚隘晦不踰七今以衆檀那力已倍之矣昔
者田入之數僅二百畝而象山塗田又輒壞於水今

幸成隄亦已倍之矣獨莊嚴象設未備桃花渡新庵欲
創而未能其何以卒吾業廣吾施乎未幾有弟子普光
者歸自江淮得設色雕塑之藝延即大殿立觀世音大
士象塗以黃金絡以衆寶幡幢華蓋亦既完好會宣慰
使李公允中旺扎勒圖公來視政首謁茲山曰吾聞貴上
人將創庵海濱以廣延接此其人行甚高宜有以助之
廼相率捐金力倡其成且名其庵普濟然後規制恢拓
棟宇弘麗鐘魚鐃鼓之音香花燈燭之供與東南諸大

招提頡頏上下而其所謂發菩提心入三摩地者邦人士益
知所禮矣至正戊戌冬予以分部董漕閩廣使過甬東
止宿寺之方丈上人款予甚厚將別執書一卷若有所
請而不言問之則狀其寺之始末以求記於予也予既
序次其事而復為之歎曰楊侯以孤身遠涉能致暹臣
之朝容公以碩德峻行能起楊侯之敬而言也貴也又
能即空捐有以獲殊勝上為天子祝釐下為民庶錫福
使愈久而愈大亦何其教之盛而信之篤耶予於是重

有感矣銘曰

大海渤澥蛟龍窟穴狂飈鼓之顛倒日月揚侯使暹摧
檣折颿被髮一呼風平浪恬惟大悲力是名菩薩圓通
出現有難斯脫歸謀容公慈濟作宮白衣金色鄞江之
東王侯士民其來什伯天子曰都錫爾今額有隆其棟
有覺其楹寶幢珠鬘鐘鼓鏗鐳曰言曰貴惟容之繼且
報且祈庶廣慈濟慈我之寓濟我之航以二者心普施
十方補陀落伽玉几阿育神光咫尺即我身毒即我身

壽永祜南服永祜南服為天子祝何千萬年無量壽福
重修定水教忠報德禪寺之碑

距慈溪縣四十五里鳴鶴山之陽橐駝峰之東有寺曰
定水教忠報德禪寺左山右湖奇勝為一縣之冠青松
夾道綠竹沿澗逶迤曲折行十餘里乃至山門始建於
唐乾元間相傳為大梅常禪師開化之地有泉出山東
麓甘冽盛夏不竭注之飲雖久不腐故名清泉其所藏
大藏經乃唐人書吏部侍郎京兆韓耕材為之記歲久

寺壞宋嘉熙間太師越國公袁韶遂大新之奏賜今額
蓋寶葉源禪師所營度也我朝至元甲午東州永禪師
來更創大殿去今六十餘年又復傾圯其他屋宇堂室
亦廩焉若不可居寺之耆宿與大夫士皆曰此非有大
作為不足以成此十七年春見心復禪師應選實來師
堅慤而任事辯博而識微既至顧瞻彷徨晨夜勤悴將
圖興作會東南兵動徭役繁興寺之力益困一日陞堂
白於衆曰吾徒逸居安食惟佛是依今雖財力殫竭獨

無一人與我共圖之乎尋有耆舊仁英捐錢五千緡為之倡未幾施者踵至曾不踰年大殿告成又有僧大用勸集衆力於殿壁後塑觀音及諸天龍鬼神之象金碧塗墍五彩輝煥而鍾樓經藏三門兩廡庖湑庫庾以次完葺比其翠幢孔蓋寶函珠笈羽翬華燈珊瑚瑪瑙一切供養之具靡不周備寺舊有兩大桂茂甚宋廬陵麟公住山日嘗製其花為香以遺誠齋楊公公荅以五詩有天香來月窟之句師因扁其坐禪之室曰天香正月

八日終其徒宗元等既塔於城南雲峰又二年戶部尚書貢師泰以祕書卿召過浙水之東其弟子天寧惠禪師天童良禪師相率謁予於舍館執進士趙友蘭所爲狀請銘乃節次其狀曰師諱明攷字舜田族張氏州之黃岩人初母周嘗事佛好施予出見饑疾者輒傾囊濟之當娠時夢異僧入室乃生師師幼穎悟日記千餘言於浮屠書一過目輒意解年十七辭父母出家留之不

可遂往僊居三學寺禮雪山曇和尚落髮受具既而聞

天童坦禪師倡道東南即詣之一見問曰達摩不東來
二祖不西往其意云何師應聲曰金不博金水不洗水
坦曰此子機鋒敏捷宗門令器也自是遍叅碩師聞人
若吉林茂公竺原道公東州永公元叟端公東嶼海公
尤器重之時日溪泳禪師居天寧請師掌三藏相與激
揚宗旨聲譽益著會僊居慈安法席久虛衆推師主之
已而三學諸宿曰此吾師受經地其可使為它山重乎
遂力挽以歸泰定初行宣政院於江浙丞相托歡公實

領院事首檄師住天台之淨惠寺至順三年移主僊居
紫籙山廣度寺至元六年宣政院使納麟高公選住處
之連山尋隱鴈山師方登高臨深超然自樂而丞相伯
勒齊爾布哈公領院事復起師主天寧師辭不獲乃笑曰
出處隨緣爾遂行先是寺毀於火師至升堂集衆揚髮
曰吾徒赤手尚能有所建立况茲寺力猶可為乎於是
衆志堅一施財以資經始曾不踰年而邃殿穹堂重門
修廡與凡樓閣庫藏之製靡不雄偉壯麗內外秩然既

事會南行臺侍御史左公江浙行省左丞特穆公以使
過台見而偉之為請於朝錫師金襴袈裟加今號久之
平章榮祿方公同知樞密院事資德公叅政正奉公分
省院於浙東咸崇信其道為作佛菩薩羅漢諸天龍神
象雕金塗砂衆寶羅絡光彩照耀一復舊觀赫然為東
南諸刹之冠矣一日召其徒曰世尊臨終示衆有言汝
等當觀吾紫摩金色之身今日則有明日則無其為
我了澈斯旨哉語已復請謝別樞密公公至師曰老

僧去矣佛法非國王大臣為之外護不可也敢以後事
為屬明日沐浴更衣淨髮跣跣而化時天大雪草木縞
素學徒悲號震動林谷葬之日以及民士罔不來會天
日澄朗道無游塵既窆大雨隨注衆嗟異之始師家居
之南有巨樟竦拔霄漢蜀僧過而指之曰茲樹西偃當
有鳴道法者出矣及生時樹果西偃師相貌雄偉言論
辨博恢擴真詮開覺迷罔後學烝烝來從如渴得啜凡
度弟子若干人得其法者曰數曰惑曰瑞曰正曰嶽曰

恩曰保曰印曰圭曰大曰空曰慧角立名利咸能蹈道
闡法藉藉有聲師喜為詩文雖片言隻字亦出人意
表嘗即巾峰下闢軒以居自號鶴松主人每朝夕煮
茶款客引鶴起舞顧影踟躕悠然自得外慮不入於
心也去年秋鶴斃賦詩悼之詞極淒婉聞者悲之踰
年而師亦厭世矣嗚呼師生赤城黃岩之野赫然名動
乎東南生能被恩寵於朝廷死能使公卿貴人奔走計
贈非其卓行高識有以異於人者其何以致是哉銘曰

三乾之學禪為宗有極其奧斯覺雄并包萬有混一空
六識皆寂衆妙融嘻師揮髮揚宗風三軍朝氣當機鋒
即真破妄明扶蒙度群弟子道彌崇出其緒餘著事功
飛甍傑構連曾穹城霞海日光曛曛菩薩羅漢諸天龍
黃金作相魏當中襴袍錫號黃帕封奔走士庶傾王公
譽聲流布龐以鴻師今化矣超玄蹤靈塔永閔台雲峰
勒銘貞石垂無窮

玩齋集卷九

謹案卷九十頁後四行巴延布哈舊作伯顏不花今改

後倣此 後六行達魯噶齊舊作達魯花赤般

若特穆爾舊作般若帖木兒今並改後倣此 七

行葉魯舊作埜驢今改 八行昂吉爾岱舊作

甕吉刺歹今改後倣此 十一頁前一行托音

布哈舊作脫因不花今改 前四行吹吉結帕

克舊作察伋揭法令改後倣此 後五行特穆

爾喇實舊作帖木烈思今改後倣此 十二頁

前八行和卓舊作喚住今改後倣此 後二行

唐古岱舊作唐兀歹今改 後六行伊埒雅蘓

舊作易理雅思今改後倣此 十六頁前五

強通舊作慶童今改 十八頁後七行明埒特

穆爾舊作明理帖木兒烏魯斯舊作幹羅思今

並改後倣此 二十三頁後二行德埒克紳舊

作德里山今改 後三行烏遜舊作萬僧今改

二十四頁後六行郭達木實哩班廸達舊作

高達摩實理板的達今改 二十六頁前二行

特穆爾達實舊作鉄木兒達識今改 二十九


頁前五行旺扎勒圖舊作完者篤今改 三十

二頁後八行托歡舊作脫歡今改 三十三頁

前四行伯勒齊爾布哈舊作別怯里不花今改

欽定四庫全書





總校官庶吉士臣張能照

校對官庶吉士臣曹錫齡

騰錄監生臣姜也魯